

СҮХБААТАР АЙМГИЙН НУТАГТ ХИЙСЭН АРХЕОЛОГИЙН СУДАЛГАА (2007)

С.ӨЛЗИЙБАЯР¹, Д.НАВААН², М.ЭРДЭНЭ²

¹ШУА-ийн Түүхийн Хүрээлэн,
e-mail: sulzii70@yahoo.com

²МУИС-ийн НШУС-ийн Археологи-Антропологи Тэнхим,
e-mail: merdene@num.edu.mn

Түлхүүр үгс: Эртний Монгол, морьтой оршуулга, Онгон, Таван толгой, Өлгий, Өгөөмөр уул, Булган хайрхан, Дулаан уул, булш хиргисүүр сүйтгэгдэж буй тухай

Өгүүллийн товч агуулга: Сүхбаатар аймгийн Мөнххаан сумын нутаг Ханан бор толгой, Шар хад болон мөн аймгийн Онгон сумын нутаг Тавантолгойд 2007 оны зун явуулсан археологийн судалгаагаар дурсгалын байршлын зургийг үйлдэж, их төлөв дундад үеийн монголын соёлд хамаарах өвөрмөц байгууламж бүхий 8 булш малтан судлав. Тавантолгойд хийсэн монголын үеийн булшны судалгаа нь урьд илэрч байгаагүй оршуулгын зан үйлийн олон элементийг (морь дагалдуулсан, баруун зүг хандуулсан, эмээлийн онцлог чимэглэл, буддын соёлын нөлөө ихтэй) илтгэж байгаа нь монголын үеийн нэгэн соёлыг ялган үзэх боломжтой шинэ эх хэрэглэгдэхүүнийг олгож байгаа юм.

Хэнтий аймгийн Баянмөнх сумын нутаг Дулаан ууланд геологийн ашиглалтын үйл ажиллагаа явуулж байгаа мэдээллийн мөрөөр уг газар хайгуул хийн урьд өмнө судлаачдын хараанд өртөөгүй байсан хүрэл, хүннү, түрэг, монголын үеийн археологийн олон дурсгалыг хадгалсан түүх соёлын томоохон дурсгалт газар болохыг илрүүлээ.

2007 оны YI сард археологич Д.Наваан, С.Өлзийбаяр, антропологич М.Эрдэнэ нараар удирдуулсан МУИС-ийн археологийн хээрийн шинжилгээний анги Сүхбаатар аймгийн Мөнххаан сумын нутаг Ханан бор толгой, Шар хад болон мөн аймгийн Онгон сумын нутаг Тавантолгойд археологийн судалгааг төвлөрүүлэн хийсний дотор дурсгалын байршлын зургийг анх удаа үйлдэж, их төлөв дундад үеийн монголын соёлд хамаарах өвөрмөц байгууламж бүхий 8 булш малтан судлав.

Сүхбаатар аймгийн Мөнххаан сумын Ханан бор толгой

Сүхбаатар аймгийн Мөнххаан сумын төвөөс баруун тийш 20 орчим км зайнд байх Ханан бор толгой хэмээх газар археологийн хайгуул, малтлага хийж 13 булш илрүүлэн холбогдох он цагийг урьдчилан тогтоож, бүртгэв. Уулын энгэр газарт 2-3 ширхгээр бүлэглэсэн, бүгд дунджаар 300-350 см голч бүхий цагираг хэлбэрт чулуун далантай, Тавантолгойн бүлэг булшны гадаад хэв шинжийг санагдуулам төстэй зохион байгуулалттай байв. Малтлагыг хийхдээ археологийн дурсгалуудын байршлын зурагт ¹ 1, 2, 7-д бүртгэгдсэн байгууламжуудыг сонгов. Үүнээс эхний

Д.Наваан урьд жилүүдэд Сүхбаатар аймгийн нутгаар ажиллахдаа Тавантолгойн бүлэг булштай гадна байдлаар төслөг дурсгалын тархалт нь зөвхөн Онгон сумын нутгаар хязгаарлагдахгүй, Мөнххаан сумын Хананбор, Шартын хад, Замын хошуу зэрэг газруудад тохиолдож байгааг урьдчилан тогтоосныг бид энэ удаагийн хээрийн шинжилгээний хүрээнд малтан шалгав. Хэдийгээр Хананбор, Шартын хад зэрэг газарт малтсан булш нь гадна хэв шинжээр Тавантолгойн бүлэг булштай төслөг хэдий ч оршуулгын зан үйлээр ихээхэн өөр болох нь ажиглагдлаа. Эдгээр булшнаас Тавантолгойн адил морьтой оршуулгын зан үйл огт илрээгүй боловч, монгол булшны тогтвортой нийтлэг зан үйл болох шагайт чөмөг, цагирган зуузай дагалдуулах зэргээрээ ижил байлаа.

Тавантолгойн бүлэг булшийг судалсан 3 жилийн судалгааны үр дүнг нэгтгэсэн бүтээл туурвих нь чухал бөгөөд энэ жилийн судалгаагаар өмнөх жилүүдийн адил монголын үед холбогдох морьтой оршуулгууд илрэв. Өмнөх жилүүдэд энд хийсэн судалгаагаар зарим булшинд (2, 5-р булш) бүтэн морийг тавьсан тухай өгүүлсэн байдаг бол энэ жилийн 9-р булшны малтлагаар морины дөрвөн мөч, толгойг төлөөлүүлэн тавьсан, 10-р булшинд бүтэн морь дагалдуулсныг магадгүй тонуулчид авсан байж болох, 11-р булшинд адууны толгойг хоромсогын дээр тавьсан байна. Тавантолгойн бүлэг булшинд адууг чулуугаар зааглан (5, 10-р булш) бүтнээр нь тавих, зөвхөн толгой дөрвөн шийрийг тавих (9-р булш) зэрэг хэлбэрээр дагалдуулж байжээ. Эндээс тогтвортой олдож байгаа эд өлгийн зүйл бол эмээл бөгөөд тэр нь эдүгээ монголчуудын дунд нэгэнт мартагдсан (байсан эсэх) бүүргийг луу, цэцгэн хээ тавьж, битүү алтадсан металл ялтсаар бүрсэн болон ердийн модон янгиа гэсэн хоёр янз байжээ. Д.Навааны өмнөх судалгаагаар дээл илэрч байсан бөгөөд энэ жил 11-р булшнаас мөн дээл бололтой (дээлээс гадна малгай, цамц маягийн хувцас) хувцас олдсон байна. Эдгээр дээл нь ташаандаа гүнзгий ухлаадастай байгаа нь Окошка уулын монгол язгууртны дээлтэй төслөг байна. Ийнхүү Тавантолгойд хийсэн монголын үеийн булшны судалгаа нь урьд илэрч байгаагүй оршуулгын зан үйлийн олон элементийг (морь дагалдуулсан, баруун зүг хандуулсан, эмээлийн онцлог чимэглэл, буддын соёлын нөлөө ихтэй) илтгэж байгаа нь монголын үеийн нэгэн соёлыг ялган үзэх боломжтой шинэ эх хэрэглэгдэхүүнийг бидэнд олгож байгаа юм. 1984 онд Читийн БДС-ийн Дээд Амарын археологийн дурсгалыг судлах экспедици Бооржийн амны Өлгий хэмээх газар монголын үед холбогдуулан үзсэн хоёр булш малтжээ. Хүнээ баруун хойд зүгт хандуулан өвөрмөц модон авсанд оршуулахдаа авсны зүүн талд нь морийг төлөөлүүлэн түүний толгой, дөрвөн мөчийг дэлэн тавьж, дээр нь модон янгиа тавьсан нь (Ковычев, Беломестнов, 1985) Таван толгойн 9-р булшны зан үйлтэй туйлын төслөг төдийгүй эмээл, цагирган зуузайн хэлбэр зэргээрээ адил байна. Бид энэ талаар цаашид гүнгийрүүлэн судлаж байгаа учраас олон зүйлийг эс нуршив.

Буриадын эрдэмтдийн 20-иод жилийн өмнө нээсэн Умард Монгол, Баруун Өвөрбайгальд ҮII зууны орчим үүсч хойцегорийн (ҮII-X), саянтуйн (X-XII) гэх хоёр шатыг дамжин хөгжсөн “Эртний Монголын” археологийн соёлын онолын үзэл баримтлалыг Ц.Төрбат нарын манай зарим судлаачид (Төрбат, Батсайхан, 1997; Төрбат, Амартүвшин, Эрдэнэбат, 2003: 114-119) ихээхэн дэмжиж байгааг эс дурдвал бид дэлхийн гүрнийг байгуулж явсан их өвгөдийнхөө үеийн археологийн соёлыг нилээд хангалтгүй мэдэж байгаагаас уг соёлын нийтлэгийн үүсэл, хэлбэршил, ондоошил, орон нутгийн өвөрмөц хэв маяг төдийгүй тархацын асуудлаар ч нэгдмэл бүү хэл ноёлох үзэл баримтлалтай болж чадахгүй байна.

Хэнтий аймгийн Баянмөнх сум

Хэнтий аймгийн Баянмөнх сумын нутаг Дулаан ууланд хятадууд газар ухаж жонш олборлож эхлээд буй мэдээг нутгийн иргэн П.Манцуйт, З.Ням-Осор нар 2007 оны эхээр зохиогчид (С.Ө) дуулгасан билээ. Бид мэдээллийн мөрөөр Сүхбаатараас буцах зам зууртаа Дулаан уулнаа ажиллан урьд өмнө судлаачдын хараанд өртөөгүй байсан хүрэл, хүннү, түрэг, монголын үеийн археологийн олон дурсгалыг хадгалсан түүх соёлын томоохон дурсгалт газар болохыг илрүүллээ. “Их Мянганы үүд” гэгч уул уурхай эрхлэх тусгай зөвшөөрөлтэй компани ашиглалтын зорилгоор газар ухаж эхэлсэн байсан бөгөөд түүнээс 20 хүрэхгүй метрийн зайнд хиргисүүр, дөрвөлжин булш (46° 44' 53,1" 109° 56' 55,9" болон 46° 44' 54,2" 109° 56' 50,7") байгаа нь тогтоогдсон болно. Олон хэсэг газруудад том талбайгаар хөрс хуулалт хийхэд булш, хиргисүүр өртсөн байж болох бүрэн магадлалтай байна. Энэ үйлдэл нь Монгол улсын Соёлын өвийг хамгаалах тухай хуулийг ноцтой зөрчсөн боловч Ашигт малтмалын тухай хуулийн дагуу ашиглалтын лицензийг АМГТХЭ газраас авсан нь манай хуулийн заалтуудыг хооронд нь уялдуулах шаардлагатай болохыг амьдралаар шалгасан хэрэг болсон юм. Дулаан ууланд археологийн нарийвчилсан судалгаа хийх, авран хамгаалах, малтах эрх Соёлын өвийн тухай хуулийн дагуу МУИС-ийн Археологийн тэнхимд хадгалагдах юм.

ТАЛАРХАЛ


Энэхүү судалгааг МУИС-ийн Азийн Судалгааны Төвийн санхүүжилтээр гүйцэтгэдэг “Дорнод Монгол” төслийн хүрээнд гүйцэтгэлээ.

НОМ ЗҮЙ


- Батсайхан З., Өлзийбаяр С., 2006.* 2005 онд Сэлэнгэ аймгийн нутагт археологийн судалгаа хийсэн тухай. *Mongolian Journal of Anthropology, Archaeology and Ethnology*, Vol. 2, 1 2 (271): 57-66
- Баяр Д., 1999.* Алтан ургийн язгууртны нэгэн булшийг судалсан нь УБ.
- Баясах Ж., 1989.* Чингис хааныг оршуулсан тухай хятад сурвалжийн мэдээ. ШУА-ийн Түүхийн хүрээлэнгийн архив
- Ковычев Е.В., Беломестнов Г.И., 1985.* Погребения с конем из Поононья: Хронология и этническая принадлежность.
- Коновалов П.К., 1989.* Корреляция средневековых археологических культур Прибайкалья и Забайкалья. Этнокультурные процессы в Юго-Восточной Сибири в средние века. Новосибирск
- Лхагвасүрэн Х., 1993.* Буурал уулын монгол булшнууд. Түүхийн судлал, Т. XXIII, fasc. 15
- Лхагвасүрэн Х., 2007.* Монголын археологи (Чингис хааны үе) I дэвтэр, УБ.
- Наваан Д., 1975.* Дорнод Монголын хүрлийн үе. УБ.
- Наваан Д., 2001.* Хануйн хөндийн монгол булшнууд. Чингис хаан судлал, т. III, f. XI. УБ.
- Наваан Д., 2005.* 2004 онд хийсэн археологийн ажлын тайлан, МУИС-ийн Антропологи-Археологийн тэнхим
- Өлзийбаяр С., 2007.* Өгөөмөрийн уйгур булш. Түүхийн судлал, Т. XXXVII, fasc. 3. УБ.
- Плано Кардини, 1988.* Монголчуудын түүх. УБ
- Төрбат Ц., Батсайхан З., 1997.* Эртний монголчуудын археологийн дурсгалыг судлах асуудалд (МЭ ҮШ-ХҮ зуун). МУИС-ийн ЭШБ. Т. 9 (126), f. ХҮШ. УБ.
- Төрбат Ц., Амартүвшин Ч., Эрдэнэбат У., 2003.* Эгийн голын сав нутаг дахь археологийн дурсгалууд. УБ.
- Цыбиктаров А.Д., 1998.* Культура плиточных могил Монголии и Забайкалья. Улан-удэ
- Эрдэнэбаатар Д., 2002.* Монгол нутгийн дөрвөлжин булш, хиргисүүрийн соёл. УБ.,



Зураг 3. Ханан бор 7-р булш (зүүн талаас)



Зураг 4. Таван толгойн археологийн байршлын зураг



Зураг 5. Тавантолгой 8-р булш



Зураг 6. Тавантолгой 9-р булш (урдаас)



Зураг 7. Таван толгой 9-р булшны оршуулга (урдаас)



Зураг 8. Тавантолгой 9-р булш. Янгиа



Зураг 9. Тавантолгой 10-р булш (урдаас)



Зураг 10. Тавантолгой 10-р булш. Эмээлийн ялтсан чимэг



Зураг 11. Тавантолгой 10-р булш. Адууны толгой



Зураг 12. Тавантолгой 11-р булш



Зураг 13. Тавантолгой 11-р булш. Хоромсого, адууны толгой



Зураг 14. Тавантолгой 11-р булш. Хоромсого



Зураг 15. Тавантолгой 11-р булш. Дээлийн хормой хэсэг, малгай



Зураг 17. Тавантолгой 11-р булш. Бүсний болор чимэг